

Syarat jadi negara maju menjelang 2020

01/1993

B.H 10 NOV 1993

KUALA LUMPUR, Isnin - Malaysia boleh menjadi negara maju menjelang tahun 2020 jika mampu mengekalkan pertumbuhan ekonomi tujuh peratus dalam tempoh 26 tahun akan datang.

Perdana Menteri, Datuk Seri Dr Mahathir Mohamad, berkata jangkakan pertumbuhan berterusan bukanlah sesuatu yang tidak berasas. Dalam tempoh 20 tahun sejak merdeka, Malaysia mencapai pertumbuhan 6.7 peratus.

Beliau berkata, keupayaan negara mengekalkan pertumbuhan tujuh peratus setahun bergantung kepada kemampuan mengekalkan pelaburan pada tahap tertinggi.

"Apa yang diperlukan bagi mencapai matlamat Wawasan 2020 ialah tambahan 0.3 peratus dalam angka pertumbuhan itu.

"Bagi membolehkan Malaysia menjadi negara maju memerlukan pertumbuhan tujuh peratus dalam tempoh 26 tahun

akan datang.

"Kita tidak terlalu ber-cita-cita besar. Kita sebenarnya sangat sederhana (bagi mencapai matlamat Wawasan 2020)," katanya ketika berucap merasmikan persidangan Malaysia: Powerhouse Of The 90's, di sini, hari ini.

Persidangan peluang perdagangan dan pelaburan di Malaysia dua hari itu dianjurkan bersama oleh akhbar International Herald Tribune, Lembaga Kemajuan Perindustrian Malaysia (Mida) dan Institut Kajian Strategik dan Antarabangsa (Isis). Ia dihadiri ahli perniagaan dan usahawan dari seluruh dunia bagi mendapatkan gambaran jelas mengenai kedudukan ekonomi serta potensi pelaburan di negara ini.

Dr Mahathir yakin matlamat Wawasan 2020 boleh dicapai berasaskan il-tizam kerajaan memenuhi hasrat rakyat. Rakyat menjadikan matlamat itu sebagai agenda nasional.

Menurutnya, walaupun

wujud masalah dalam negara, ia adalah sesuatu yang tidak dapat dielakkan. Bagaimanapun, kerajaan mampu mengatasinya. Ini termasuk masalah kekurangan buruh, produktiviti rendah, kekurangan kemudahan infrastruktur dan inflasi.

Katanya, apa yang lebih kritikal ialah usaha mengekalkan kedudukan politik dan iklim ekonomi yang baik untuk beberapa tahun akan datang.

"Jika kita mengabaikan hasrat rakyat, bererti kerajaan mengaku kalah," katanya.

Perdana Menteri berkata, Malaysia sebenarnya berpengalaman dalam menguruskan ekonomi negara. Ia membuktikan keupayaan jentera pentadbiran kerajaan keseluruhannya.

Menurutnya, walaupun berlaku krisis ekonomi dan politik dalam dan luar negara, ekonomi Malaysia terus berkembang dengan pesat.

Perdana Menteri juga

menyentuh tahap ekonomi negara sekarang dan harapan pada masa depan.

Dr Mahathir berkata, Wawasan 2020 adalah penghurairan secara jitu keazaman negara menjadi sebuah negara maju meliputi aspek sosioekonomi, teknologi, politik serta etika dan kerohanian.

Menurutnya, sektor swasta juga perlu bertindak sebagai tonggak barisan depan menarik pelaburan.

"Malaysia terbukti berjaya dalam memajukan tahap fizikal, perundangan, pentadbiran dan kewangan bagi mengekalkan pelaburan di antara 34 dan 35 peratus Keluaran Dalam Negara Kasar (KDNK)," katanya.

Dr Mahathir berkata, dengan jumlah simpanan yang tinggi, iaitu kira-kira 35 peratus daripada KDNK ia menyediakan dana yang diperlukan serta disokong perancangan jangka panjang.